

臣義士駢肩疊跡自古未  
有若斯之盛者也漢唐宋  
之已事可睹已孝惠蚤世  
政出房闈易置諸侯王如  
反掌崛起彊廷諍一安國侯

耳玄武門喋血夜半戮斧  
王魏朝射鉤夕委贄姦普  
傳會金匱佐成廷美德昭  
之歿悲夫此皆創業貽謀  
不及一世二世者也而艱





難變故之時忠義漸滅國  
如無人焉悲夫

明興革除日月之際

元孫遜荒

真人踐胙不托天與人歸乎

乃諸臣爭首陽之節趨歿  
如飴決脰屠腸血肉狼藉  
肢體斷續妻孥親戚皆反  
接貫五木繫、牽就戮不  
少瞬雖湛九族靡悔其從



容絕命間關從亡卓犖可  
紀者甚衆若堙沒不得稱  
者又不可勝數也顧遺事  
與蹟遠復見于世學士  
好稱之何哉

高皇帝手提八紘于彝倫混  
焚之日變醜養瘠堯醜舜  
薰不及百年風移俗革

天聖人作爲過化存神之妙  
如此故以



高皇帝之功則易世之後神器不當杌隳而再安以

高皇帝之德則非變出非恒士爭死義不足以見培養忠孝廉耻之報以

高皇帝之智不難舍伯邑考立武舍膾立衍而不可失萬世立嫡之正以

文皇帝之仁不難赦斬祛之罪旌漆身吞炭之忠而無



以見曠古臣子之烈故臣  
謂諸臣之忠

高皇帝生之而

文皇帝成之也生成之恩唯  
君唯父即頌言無諱以明

雨露霜雪之皆恩言之者  
奚罪乎嗟乎中山開平之  
流純德元勳前代未有固  
已宣昭於鑠矣要以礪世  
磨鈍扶天綱植人紀思育



賢于菁莪咏食德于豐鎬  
如方練耿鐵之義又曷可  
少哉斯固有道君子之所  
欲揚扆也南都舊有忠節  
錄刻于太常而事久論愈

定諸臣爲

建文請編年爲諸忠請卹  
請祀先後爭上書而南禮  
曹周仲馭特請易名且將  
進而請



建文廟號焉于是搜輯衆  
聞補所未備凡若干卷曰  
遜國忠紀藏之家塾以俟  
國史而屬予爲之序

古吳楊廷樞題

自叙



歲辛未予徙官南禮曹予  
大人方從滇中歸得假省  
旬曲則呼小子鑣而命之  
曰詩首國風正倫事也禮



始冠昏慎萌兆也爾禮官也禮廢興可不聞耶今王祭無樂大臣無廟仕不奔祖父母之喪無功總之假昏葬任俗飲射故事民無

定止而渙士異學而莫正紳大夫始砥行終亦敗名伶道秉祀齊賤干制嗚呼禮之亡蓋已久矣國無禮猶水無防人無禮猶室無



基衝嚙圮毀豈有極哉爾  
小子備官其又奚以掾之  
耶予伏而思退而慨然曰  
禮之行也風俗見之其夷  
也廷廟求之南曹無他掌

故洪武之制非不犁然無  
其職莫或舉也然而君臣  
之間國家興革之數人士  
孝忠厚薄之故所謂禮孰  
大焉予官居南爲豐鎬舊



地當時金川失守諸臣効  
死其

國朝三百年禮運之所存  
乎革除朔事也死節諸臣  
奇忠也逸久莫旌人懷伊

鬱嗚呼節義何物蹈之則  
安背之則罔士氣何嘗揚  
之則奮摧之則靡蓋自良  
心喪而民趨迷民趨迷而  
公論沮上無以御其下下



無所望於上嗚呼君國者  
之以禮治天下豈其然哉  
於是草疏請爲建文死節  
諸臣易名以彰勸厲旣入  
得 下部議復

天子仁聖澤及沈土所以  
教天下後世之爲人臣者  
此謂能有禮也予時有再  
疏三疏尋罷歸大人迎謂  
曰此老臣志也小子不苟



於祿無急急於進其亦不  
失禮意者與乃命緝諸家  
所載諸臣本末成忠紀梓  
之以傳焉

前禮官華陽周鑣題

遜國忠紀凡例

一革除紀事幾廿餘種而詳略異同違違互見爲  
酌其近於信者著之餘則汰之

一忠紀者紀忠也或誅死或戰死或沈於淵或焚  
於火或卒於獄或歿於道或鴆毒或雉經或從  
亾或行遜或謫戍或投城或棄官或辭召雖有  
殊迹要無二心故並書之臣誼絕者削不書

一從亡一事世相傳爲程編修一人耳逮史仲彬  
致身錄出迺知二十二人之殊節並皎皎也論



者以爲有衰偃捍圉之力反國無期有橫客刎  
頸之忠從容更篤旣不流殃於族屬兼復全義  
於君臣似於方練諸公衷有較苦者爲著一卷  
一致身錄所載諸忠爵里始卒類多弗符於他書  
者如程濟爲績溪人牛景先爲所鎮撫王良係  
從亡等是也今壹以本錄爲正蓋以出之所見  
者真也

一尚書徐公侍郎金公松江同知某向逸姓名久  
矣合以拊膝錄所紀迺得其實今爲疏之

一彙次文武分曹堂屬共體內外異敘貴賤差等  
凡以尊朝廷也附閨闈者以狗節於家猶夫效  
忠於國也

一本傳之後間有附錄者或以存疑或以標異或  
以辨真也外此則弗錄

一遜國諸事時久寢著如松陽王詔得奇秘錄於  
輪藏所不經識者數人焦太史竑得致身錄於  
茅山所不經識者又數人近見劉玉海拊膝錄  
更爲詳核迺知忠義不泯終且發皇尚冀寓內



博雅君子補備搜逸勗我同志

遜國忠紀凡例終

遜國忠紀目次

卷一

翰林院

文學博士方孝孺

春坊大學士林右

侍讀樓璉

侍讀史彬

事載從亡

修撰王叔英

修撰吳成學



修撰王良

編修程濟

事載從亾

編修趙天泰

事載從亾

編修陳忠

待詔鄭洽

事載從亾

卷二

吏部

尚書張統

侍郎毛太

戶部

侍郎卓敬

侍郎盧迥

侍郎郭任

主事巨敬

禮部

尚書太子少保陳廸

侍郎黃魁

侍中掌尚寶司事黃觀



兵部

尚書齊泰

尚書鐵鉉

侍郎陳植

侍郎邊昇

侍郎徐庠

侍郎廖平

事載從亡

主事樊士信

刑部

尚書侯泰

尚書恭昭

侍郎張昂

侍郎金焦

事載從亡

侍郎胡子昭

侍郎金有聲

郎中柳一景

郎中梁田玉

事載從亡

主事徐子權



主事劉原弼

司務馮漼 事載從

工部

尚書徐貞

郎中韓節

郎中張安國

卷三

御史府

御史大夫練子寧

御史大夫景清

副都御史茅大方

副都御史陳性善

僉都御史周璿

僉都御史司中

巡撫都御史黃清

監察御史曾鳳韶

監察御史董鏞

監察御史王度



監察御史魏冕

監察御史甘霖

監察御史高翔

監察御史王彬

監察御史鄭公智

監察御史王玘

監察御史葉希賢

事載從臣

監察御史謝昇

監察御史韓郁

監察御史丁志方

左拾遺

戴德葵

卷四

大理寺

少卿胡閻

寺丞鄒瑾

寺丞彭與明

寺丞劉端



寺丞王高 與劉合傳

卷五

六科

戶科都給事中龔泰

戶科給事中陳繼之

戶科給事中韓永

禮科左給事中黃鉞

中書科

中書舍人何申

中書舍人梁良玉

以後四人俱載後亡

中書舍人梁中節

中書舍人宋和

中書舍人郭節

卷六

太常寺

太常寺卿兼翰林院學士黃子澄

少卿盧原質

少卿廖昇



少卿兼翰林院學士高遜志

國子監

博士黃彥清

欽天監

監正王之臣 事載從亡

監副劉伯完

入府

經歷宋徽

布政司

叅政鄭居貞

叅政陳周

叅政蔡運 事載從亡

按察司

按察使李文敏

按察使王良 事載從亡

按察使黃直

副使程本立



僉事湯宗

僉事林嘉猷

僉事胡子義

卷八

府

徽州知府陳彥回

蘇州知府姚善

衛輝知府孫鎮

寧波知府王璉

徽州知府黃希范

袁州知府楊任

知府葉惠仲

常州同知石允常

松江同知周繼瑜

夔州通判王禎

州

東平州吏目鄭華

卷九



縣

沛縣知縣顏伯瑋

樂平知縣張彥方

蕭縣知縣鄭恕

獻縣知縣向朴

沛縣主簿唐子清

沛縣典史黃謙

永清縣攝縣事典史周縉

儒學官

漳州教授陳思賢

青州教諭劉固

濟陽教諭王省

德化教諭豐寅初

開封訓導林大同

卷十

諸王府

燕府長史葛誠

寧府長史石揆



遼府長史程通

晉府長史龍鐔

谷府長史劉璟

秦府長史鄒朴

衡府紀善翰林纂修官周是修

吳府教授楊應能

事載從亡

燕府伴讀俞逢辰

叅軍斷事

高巍

行軍斷事

錢芹

卷十一

公

太子太傅魏國公徐輝祖

侯

越巂侯俞通淵

大將軍長興侯耿炳文

歷城侯盛庸



駙馬

駙馬都尉灤城侯李堅

駙馬都尉總兵官梅殷

駙馬都尉都督僉事耿璿

駙馬都尉胡觀

駙馬都尉李祺

卷十二

都督府

都督廖鏞

都督同知孫岳

都督僉事耿璿

都督甯忠

都督陳暉

都督余瑱

都督同知陳質

都督潘忠

都督僉事徐凱

卷十三



衛所

都指揮謝貴

都指揮彭二

都指揮馬宣

都指揮朱鑑

都指揮瞿能

都指揮宋忠

都指揮彭聚

都指揮孫泰

都指揮莊得

都指揮楚智

都指揮張皂旗

都指揮楊松

都指揮卜萬

指揮崇剛

指揮滕聚

指揮盧振

指揮趙諒



指揮宋瑄

指揮張倫

指揮小馬王

鎮撫曾濬

鎮撫楊本

鎮撫周拱元

鎮撫徐讓

鎮撫衛健

鎮撫王資

事載從亡

鎮撫劉伸

事載從亡

鎮撫牛景先

事載從亡

千戶倪諒

卷十四

舉人

劉政

國子生

高賢寧

王志



生員

伍性原

陳應宗

林珏

鄒君默

曾廷瑞

呂賢

以上六人合傳

布衣

王稔

王賓

俞貞木

楊福

袁杞山

內官監

段實

周恕

事載從亡

何洲

事載從亡

戍卒



燕山衛卒儲福

金川門守卒龔翊

皂隸

茅印仔

卷十五

失官職

盧振

梁良用

高不危

郭良

馬坤

朱進

杜奇

黃墀

陳子方  
與黃合傳

卷十六

失姓名

燕奉祠何



內璫某

河西傭

川中補鍋匠

馮翁

王公

東湖樵夫

樂清樵夫

耶溪樵夫

雲門寺僧

洞庭居士

雪菴和尚

卷十七

從亡

翰林院侍讀史彬

翰林院編修程濟

翰林院編修趙天泰

翰林院待詔鄭洽

兵部侍郎廖平



刑部侍郎金焦

刑部郎中梁田玉

刑部司務馮灌

監察御史葉希賢

中書舍人梁良玉

中書舍人梁中節

中書舍人宋和

中書舍人郭節

欽天監監正王之臣

四川叅政蔡運

浙江按察使王良

吳府教授楊應能

所鎮撫牛景先

所鎮撫王資

所鎮撫劉伸

太監周恕

太監何洲



附閨闈

方孝孺妻鄭氏

王叔英妻女

黃觀妻翁氏并二女

齊泰女

鐵鉉二女

張安國妻賈氏

胡閨女郡奴

曾鳳韶妻李氏

龔泰妻

戴德彝嫂項氏

王良妻

鄭恕二女

王省女

儲福妻范氏



禮部爲議謚久稽勵世宜急乞

勅速完

大典以襄治道事本部祠祭清吏司案呈崇禎五年  
九月十四日奉本部送禮科抄出禮科都給事  
中張國維題稱竊維古者蓋棺定謚而美惡並  
存故仕者之家或懼斥其謬戾有不敢請者乃  
今日大臣身故則無人不請卹無請不及謚似  
以祭葬贈謚爲相因之舉陳乞之濫至今極矣  
總因彰善之令未明故覬覦之情兢起與其不



予以明重何如嚴加甄別之足明重也與其不  
禁人請以示勸何如不待其請之更足勸也謚  
例五年一舉今則缺至十二年說者謂天啓年  
間是非淆溷袞鉞不靈造物實秘此幽光以俟  
今日乃崇禎二年已經具題發訪何南北各衙  
門未繳一冊而催請復杳如也頃有爲遜國諸  
臣請謚者奉

旨下部酌議仰見

皇上表忠至意超越千古卽如邇者特謚鄒元標等

十餘人其於理學文章忠諫節義殆兼重矣然

自鄒忠介馮恭定顧端文而外豈更無壇壝

孔孟羨墻濂洛者乎王莊毅而外豈更無功在

國本品著抨彈者乎趙忠毅高忠憲楊忠烈魏忠

節周忠介而外豈更無萇弘血碧范滂心丹者

乎唐襄文而外豈更無羽翼經傳鼓吹休明者

乎滿毅愍而外豈更無斷脰決腹一瞑而萬世

不視者乎或異時而踵相接或同事而典稍殊

幽壤久鬱直道在人表章誠不容緩矣夫揚善



易失之泛而論人難覈其真臣竊陳膚見則宜  
詳者有三焉宜慎者有三焉冊開六百餘人薰  
醜同器已有魚目混珠之歎至於冊內旣臚遂  
國諸臣而純忠如卓敬輩尚多不載豈非

盛典有缺是必濫者刪之母令考行之林等於仕版  
略者補之母令闡幽之事空載稗官而後品評  
有據也宜詳者一

國初定謚首及武功今冊內絕無齒及者果文墨  
不與介冑伍耶抑糾垣未間出耶卽如革除間

弁流慷慨殉節者不減文臣豈不得與景鐵諸  
人相輝映乎遵

祖

制則餼羊宜存勵行間則駿骨當市博採並列以示  
鼓舞可也宜詳者二往時綸扉講幄之地多有  
褒稱而及於庶司者十之一高爵厚祿之班易  
發芬芳而及於小臣與外吏者百之一豈官崇  
則品乃崇而下僚不須砥節乎夫祭墓猶兼論  
品何易名專主序官

先朝衛幕不謚忠愍吏目不謚忠介與宜詳者三子



孫之疏揭無非飾美撫按之題覆亦多諛詞而  
大要以建豎爲據考諸謚典不曰節槩爲朝野  
具瞻則曰勲猷係

國家休戚故人臣立朝昌言則著於建白偉業必  
紀於編年安得舍記載而問家乘無大節而求  
細行乎宜慎者一人門之憑藉力易借援鄉黨  
之游揚情私先達而大要不延譽爲真共見共  
聞之事則不必譽公是公非之場則不可譽可  
法可傳之人亦不受譽儻勢力有權而單門衰

胤絕聖於闡揚情緣不斷而事久人湮一任其  
埋沒謂公論何宜慎者二逞愛憎之情將雌黃  
信口逐分岐之見恐倒置絲人而大要以秉公  
虛爲貴率意品題則異固偏私同亦附和留心  
往哲則同豈隨聲異非標榜某某應謚必有不  
易之褒評某某不應謚必有森然之斧鉞安得  
衡鑒無主依樣葫蘆哉宜慎者三而兩言以蔽  
之則曰寧苛毋恕寧寡無多在

廷諸臣各有良心各有血性寧忍使貞魂生氣消



溷於苟祿盜名之輩此無待想到人非鬼責始存公道也

先朝時禮部主事陸淵之議陳文不宜謚莊靖給事中劉世揚議李鏊不宜謚恭敏固有追論之法在今

聖明勵世豈容以駁正俟後人臣待罪禮垣敢不持白簡以佐青史哉伏乞

勅下該部定限歲內舉行仍

勅矢公嚴核毋負

盛典世道幸甚等因本年九月十一日奉

聖旨謚典久稽這條奏事理着禮部看議來說欽此欽遵抄出到部隨該本年九月二十九日太子太傅禮部尚書兼翰林院學士黃汝良等題覆前事本年十月十二日奉

聖旨謚法有關風勵依議詳諮確覈務協公評不得徇私憑臆致乖大典其發單仍勒限報部毋再稽延欽此欽遵卽將遜國諸臣及歷年卹贈并名賢韞璞刊刻成書分送南北九卿詹翰臺省



查照

欽依事理虛公博訪詳慎覈實于每名下將本人生  
平大節忠猷高風景行實有證據者詳著于篇  
有最上者書的應謚三字上次者書應謚二字  
又次者書議謚二字其不應入者書一不字仍  
另明開行實要緊字樣俱加印信鈐蓋以防洩  
換在北者的于本年五月內收單在南者的于  
本年七月內收單以便刻期會議上  
請大典可完此係三奉

明旨期在速行幸勿視爲故套逗遛愆期須至咨者



遜國忠紀卷之一

翰林院

文學博士方孝孺

華陽周

鑣仲馭編次

方孝孺字希直一字希古別號遜志浙江寧海人  
父克勤 國初繇薦辟爲濟寧守學術治行名于  
時子三人孝孺其仲也生之夕有大星墜其所自  
幼精敏絕倫雙瞳炯炯如電日讀書積寸爲文雄  
邁醇深鄉人呼爲小韓子年十四五侍父宦游齊



魯間歷覽周公孔子廟宅問陋巷舞雩所在慨歎  
孔子不得爲依歸洪武八年克勤被誣逮獄孝孺  
上書政府願以身代不報明年以文謁宋濂深器  
之爲假館授業焉會克勤坐空印事再被誣孝孺  
復草疏將伏闕上訴而克勤歿孝孺扶喪歸葬  
哀動行路是時濂亦乞身還金華孝孺往來四年  
盡得其所學先輩如胡翰蘇伯衡皆自謂弗及也  
孝孺顧末視文藝以明王道闢異端爲已任世咸  
以爲程朱復出嘗臥病絕糧家人以告笑曰古有

三旬九食餅無儲粟者貧豈獨我哉洪武十五年  
以學士吳沉揭樞薦召見

上謂樞曰孝孺孰與汝樞曰十倍于臣使見皇太  
子賜宴故歆其儿以試之孝孺必正之乃坐

上使人覘之喜謂皇太子曰此莊士也當老其才  
輔汝試靈芝甘露論

上每面試舉子輒親定高下注選至孝孺獨不注曰  
異人也吾不能用留爲子孫光輔太平足矣皇  
太子重之待以賓友遣還鄉孝孺歸杜門纂述適



有仇家獲罪詞連孝孺所司例籍其家械送闕下  
上識孝孺名特賜開釋令奉祖母挈妻子還二十五  
年復辟至

上方重賞罰謂左右曰今非用孝孺時乃擢將仕佐  
郎漢中府學教授漢中水土梟惡病瘦痿者十人  
而五孝孺安之甘蔬糲與諸生談道不倦視其色  
若飫萬鍾者絲是山南人皆知向學二十七年春  
蜀獻王延之爲世子師孝孺每見必陳說道德仁  
義王喜甚講經論文無虛日歎曰方先生古之賢

者也爲名其讀書之廬曰正學故當時蜀治依于  
禮樂諸王莫比焉丙子徵入典應天試三十一年  
閏五月

太祖大漸遺令先召孝孺 皇太孫卽位立馳驛召  
還爲翰林博士進侍講學士暨董倫侍經筵備顧  
問凡將相大政議輒咨孝孺讀書每有疑卽召使  
講解臨朝奏事臣僚面議可否必命孝孺就扆前  
批荅時大召名儒脩

太祖實錄及類要諸書孝孺爲總裁會改謹身殿名



正心孝孺獻銘作凝命神寶孝孺又獻頌皆規正  
君德比定官制改侍講學士爲文學博士卽以授  
孝孺靖難兵起日召謀議詔檄皆出孝孺手兵旣  
渡淮畫策堅守誓死社稷知事不可爲乃作絕命  
辭曰天降禍亂兮不知其出奸臣得計兮謀國用  
猶忠臣發憤兮血淚交流以此狗君兮抑又何求  
嗚呼哀哉兮庶不我尤初

文皇師出北平姚廣孝送之郊曰江南有方孝孺者  
必不降殿下勿殺此人殺之天下讀書種子絕矣

北師入京 建文君遜去孝孺服斬衰晝夜哭

上使廖鏞兄弟召之不至使鎮撫伍雲收之孝孺杖  
衰絰至 闕下大哭

上怒令繫獄猶遣人諭再三不從時將詔諭天下命  
廷臣舉代草者以孝孺對趣使人召之不至乃使  
人擁之入旣至孝孺悲慟聲徹殿陛間左右禁之  
莫能止

上親降榻勞曰先生何自苦余欲法周公輔成王耳  
孝孺曰成王今安在



上曰渠自焚死孝孺曰成王卽不在何不立成王之  
子

上曰國賴長君曰何不立成王之弟

上曰此朕家事耳先生何自苦置之左右授筆札曰  
詔天下非先生草不可孝孺大批數字云云投筆  
于地又大哭且哭且罵曰死卽死詔不可草

上口汝不顧九族矣孝孺奮然曰能殺我九族不能  
殺我十族復且哭且罵

上大怒令以刀抉其口兩旁至耳孝孺猶嚙血犯御  
座罵聲喃喃不絕磔之聚寶門外至死乃已時年  
四十六詔收其妻鄭鄭先以自經死悉燔夷方氏  
墓籍九族母族林彥清等妻族鄭原吉等五服之  
親皆誅戮

上怒不已必欲誅十族乃以門人廖鏞等爲一族誅  
之凡坐死者八百四十七人謫戍絕徼者不可勝  
計孝孺和粹貞亮事親孝處師友篤恩義宋濂遷  
蜀孝孺不得與俱爲文籲天願輸壽以延之時閱  
其遺文談其往事泣數行下濂没于夔孝孺自漢



中走哭盡哀言於蜀獻王厚恤其家道夔必艤船  
哭移時乃去與郭濬林右劉綱王紳王綺鄭楷趙  
象王叔英劉浩葉見太友善晤語遺書必切劘道  
義其文章議論波瀾大類蘇氏而忠義之氣凜然  
不可犯嘗謂道之于事無乎不在列爲二十八箴  
又作雜誠三十八章以自儆謂化民必自正家始  
作宗儀九篇謂先王之治先德化而後政刑作深  
慮十篇以篡臣女主夷狄雖一天下不可爲正統  
作釋統三篇多先哲所未發四方夷裔得其一字

寶于金壁所著有遜志齋集四十卷又有周禮考  
次大易枝辭武王戒書註帝王基命錄文統宋史  
要言諸書逸不傳洪熙初

仁廟嘗謂羣臣曰若孝孺輩皆忠臣詔奸臣黨與從  
寬典方氏遺族始有赦還鄉者因立祠祀孝孺成  
化初遺文始行于世或曰錄孝孺家時得寧海典  
史魏澤悉力周旋藏其幼子以故方氏有後謝文  
肅公詩所謂孫枝一葉是君恩也澤字彥恩應天  
溧水人有學行洪武中累官至刑部尚書後謫寧



海

春坊大學士林右

林右字公輔浙之臨海人丁元亂不仕洪武初爲中書舍人與希直原采爲莫逆交嘗奉璽書行邊有戡定功進春坊大學士命輔導皇太孫以事謫中都教授尋掛冠歸靖難師起聞希直族誅爲位哭于家永樂戊子島夷訶海上台被其毒監司聞右才請爲閭里計右不得辭勉起視兵督郡子弟勦平之

上以此知右遣使召不赴令武士械至京師然猶爲



溫語相慰勞與加錄用也右對曰罪人逃死已久  
藉令可仕當與方孝孺同朝矣

上大怒命曳出剗之竟死後數十年葉恥齋銓次其  
遺文鄉人陳龍山復爲之傳右節始著今祀鄉賢

祠

侍讀樓璉

樓璉字士連浙江金華人嘗從宋濂學洪武中以  
儒士召歷宣寧仁壽大冶三縣主簿陞藍田知縣  
擢廣東道監察御史以事謫戍雲南 建文君嗣  
位屢下詔求賢璉以文學舉入翰林侍經筵官至  
侍讀靖難兵入京

文皇命方孝孺草詔不屈戮死復改命璉及王景璉  
入見孝孺受極刑惶怖受命歸而憤歎妻子問之  
曰得無傷方先生耶璉愧曰我受刑猶可恐累及



汝輩耳逡巡一夕自經死

修撰王叔英

王叔英字原采號靜學浙江黃巖人初從外姓陳篤志力學雅尚風節洪武中與楊大中葉見太方孝孺林右並徵至京叔英固辭還鄉素善孝孺相與道義切劘名籍甚二十年部使者薦爲仙居學訓導三十年改德安府學陞漢陽知縣有惠政建文初孝孺欲復井田叔英移書力阻之其略曰凡人有所措天下之才者固難能自用其才者尤難子房之於高祖能用其才者也賈誼之於文帝不能



用其才者也子房之於高祖察其可行而後言言之未嘗不中高祖得以行之賈誼之於文帝不察其未能而易言之且又言之太過故大臣絳灌之屬得以短之於是文帝不能獲用其言方今明良相逢千載一時但天下之事固有行於古而亦可行於今者如夏時周冕之類是也亦有行於古而難行於今者如井田封建之類是也可行者行則人之從之也易難行者行則人之從之也難從之易則民樂其利從之難則民受其患此君子用世

貴得時措之宜也召爲翰林修撰上資治八策曰務問學謹好惡辨邪正納諫諍審才否慎刑賞明利害定法制皆援古証今鑿鑿可行又曰

太祖皇帝除奸剔穢抑強鋤梗如醫去病如農去草去病急或傷體膚去草嚴或傷禾稼固自然之勢體膚病去則宜調燮其血氣禾稼草去則宜培養其根苗亦宜然之理 建文君嘉納之與方孝孺日見信用比兵至淮上游兵逼江干 建文君遣使四出募兵叔英奉詔行至廣德間 建文君遜



位慟哭會齊泰來奔叔英口泰貳心矣急擒泰至  
問之故乃相抱慟哭與泰圖後舉已而卧病且篤  
知事不可爲乃起沐浴具衣冠書絕命詞藏裾間  
自經于玄妙觀銀杏樹下時年未四十也詞曰人  
生穹壤間忠孝貴克全嗟余事君父自省多過愆  
有志未及竟奇疾忽見纏肥甘空在案對之不能  
嚥意者造化神有命歸九泉嘗念夷與齊餓死首  
陽巔周粟豈不佳所見良獨偏高蹤邈難繼偶爾  
無足傳千秋史官筆慎勿稱希賢又題其案曰生

旣久矣未有補于當時死亦徒然庶無慚于後世  
陳瑛簿錄其家妻金已自經二女赴井死或上其  
所賦詩

上曰彼食其祿自盡其心耳置不問初叔英將死移  
書天台道士盛希年死後葬我祠山麓希年卒收  
葬之墓在州城西五里許正統中楊士奇題其墓  
曰嗚呼翰林修撰王原采之墓成化中州守莆田  
周瑛封植表識之嘉靖中編修安福鄒守益謫州  
判官立祠祀焉太平知縣曾漢才又建忠節祠祀



叔英妻及二女有貞烈祠在黃淡畧上叔英自少以孝稱既出仕好獎拔善類楊士奇未遇薄遊湖湘叔英識之既歸朝表薦其才士奇繇此得召用嘗自言曰余在衆中往往聞孝子友弟義婦事未嘗不爲之感激流涕欲錄傳以爲後世勸益其慷慨義烈出自性生如此所著有靜學集方孝孺嘗稱其文章敷瞻紆餘有作者風云

### 修撰吳成學

吳成學浙江人國初舉賢良建文中爲翰林修撰壬午六月之變家人驚潰相失疑其死成學實出亡也隱姓名爲僧號雪菴走西南重慶之善慶里與隱士杜景賢往來構菴於白龍山之松栢灘遂終焉

按此屬劉琳拊膝錄所載則疑雪菴爲葉希賢爲郭節者宜皆非矣成學名未著於他書今爲表出而雪菴本傳仍列後失姓名中凡以事介



信疑未敢謬指云

修撰王良

王良字敬止江西吉水人建文元年鄉試第一明年舉禮部廷對策最優以貌不揚易胡靖第一良次之又次李貫並授翰林修撰如洪武十八年乙丑故事良初聞靖難師起輒憂憤不食及渡淮卽訣妻子曰食人之祿者死人之事吾不可復生矣安能顧若等哉迨北師入城胡靖解縉吳溥爲良鄉人寓舍連楹皆踰垣集溥舍縉陳說大義靖亦憤激慷慨良獨流涕不言溥曰三子受知最深事



在頃刻若溥去就固可從容也隨別去時溥子與  
弼尚幼嘆曰胡叔能仗節大是佳事溥曰不然獨  
王叔死耳語未竟隔墻聞靖呼曰外闕甚可看豬  
溥顧與弼曰一豬不忍寧自忍乎須臾良舍哭聲  
動已伏鴆死矣靖縉與李貫皆迎附永樂初出建  
文時羣臣封事千餘通命貫與縉等編閣留軍馬  
田糧數盡焚諸干犯者因從容問貫縉等曰爾等  
宜皆有之衆未對貫獨頓首曰臣貫實未嘗有也  
文皇曰爾以是爲美耶食其祿思任其事當國家危

急時官近侍獨無一言可乎朕非惡夫盡心於建  
文者但惡導建文壞祖法亂政耳爾等前日事彼  
則忠於彼今日事朕當忠於朕不必曲自遮蔽也  
後貫遷中允坐累繫十年竟死獄中貫亦吉水人  
按吉安志北師溥都城羣臣多往迎附王良獨  
闔門與妻訣是夜吞腦子死別記乃云良以辛  
巳九月卒 帝遣禮部侍中黃觀諭祭非也良  
家畏及追戮故云吳康齋述所目覩審矣



編修陳忠

陳忠字思中浙江鄞縣人洪武甲戌進士第二官  
翰林編修素有志操以道義自持靖難兵入金川  
門忠不屈死之